

He Aha Kei Roto?

nā Tipene Watson


Atakura

He Whakatau

Me mātua pānui kia mārāma rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. I haere koe ki te kimi taonga? He aha te taonga i kimi koe? He aha te taonga kei roto i te pukapuka *He Aha Kei Roto?*



He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Kōrero mō ngā kimi taonga me te pātai atu ki te ākonga āe rānei kua uru atu ia ki roto i tētahi rapunga taonga, kāore rānei.

Matapakia te whai tiwhiri ki te neke atu i tētahi wāhanga ki tērā ka whai tonu ake.

Ki te ākonga, he aha tēnei mea te taonga?

Whakahaeretia ai aua mahi i ngā wā katoa mō te rapu taonga pērā i te kōura, te moni hoki?

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tataua i ngā hē), te rere o te reo;
- titiro mēnā e mārāma ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te mahi a te tamaiti i roto i te pukapuka?
2. Nā wai te tiwhiri tuatahi i hoatu ki a ia?
3. He aha te taonga i roto i te pōhā?
4. E kī ana te tamaiti mō “mātau”. Ki a koe, ko wai i haere tahi atu?
5. Ki ōu whakaaro, he aha pea ngā whakaaro o te tamaiti i tana kitenga i te “taonga”?

Ngā whakautu ki ngā whakapuaki māramatanga

1. He whai i ngā tiwhiri hei rapu i tētahi mea, he taonga pea.
2. Nā ōna mātua.
3. He tīti.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

Te pūtake

I He tautuhi i tētahi raupapatanga.

He whakatakinga ā-roto, he whakaharatau

I mua i te pānui i te pukapuka, matapakia te mōhio o te ākonga ki te rapu taonga mā te whakamahi i ētahi tiwhiri, ētahi mahere, ētahi aha. I te kitenga o te taonga, he mea miharo taua taonga ki te kaikite i ētahi wā. He aha ai?

Kia oti i te ākonga te pukapuka te pānui, matapakia he aha aua mea, te pōhā me te tīti. He aha te mōhio o te ākonga ki aua mea? I pōhēhē te ākonga he aha kē te taonga?

Matapakia ngā mahi o ngā tiwhiri me te hiahia kia āta kite ā-hātepetia ngā tuhinga.

Rangahaua ētahi kairapu taonga rongonui o Aotearoa me ngā taonga i kitea e rātou. (Hei tauira: Kelly Tarlton rāua ko Wade Doak – ngā paeārautanga; Joan Wiffen – te parawae mokoweri tuatahi i kitea ai i Aotearoa.) He aha ngā tiwhiri nā rātou i whakamahi?